
Antóniu Garriú Correas

BREVIH INDILGUIH BIOGRÁFICUH

Antoine Marie Roger de Saint-Exupéry hubu nacencia en loh mehmuh emprencipiu 'el sigru, el 29 de Huniu de 1900, en la ciudá de Lyon, de nobli parentela. Deseguía va a que-alsi güélfanu pol parti pairi, diendu a vivil an ca la su tía renti a Ambérieu.

Va a dil a ihcuela con loh hesuitah en Sainte-Croix-du-Mans, manteniendu un compartamientu "irregulal". Asihti a licionih de violín. Arremata loh suh ehtudiuh primariuh en Fribourg (Suiza) en metá to la Iª Guerra Mundial. Aluegu vivi una temporaína en Paris ondi hizu el preparatoriu d'ingresu a la Ihcuela Naval... ¡ehtudianti rebeldi... es suhpendíu en el desamin oral. Se matricula en Bellah Artih.

En el año 1921 emprencipia el serviciu melital en Strasbourg ondi púu deprendel a pilotar avionih, el su ehcarabahéu de continu. Dihpuesinu ehprimenta en variuh indilguh, hasta qu'en el año 1926 entra comu pilotu en la compañía "Société Latécoère", linia encargá en el trahporti aériu de correu entri Toulouse y Dakar. Al cabu un año eh hechu hefi d'aeropuertu de Cabu Juby en Ríu d'Oru, mentrih sobrevieni el levantamientu de Marruecu. Se pon a dehcrebil "Courrier Soud" (Correu Sul).

Al cabu un pal d'añuh, la su compañía, dehtiraha lah lindih a América 'el Sul... cuandu trehpasal Loh Andih era cuh-

tión d'éroih. Ehti periodu lu quea repañáu en el maravilloso libru "Vol de Nuit" (Vuelu de Nochi), con el cualu ganaríe el premiu "Fémina" en 1931. Esi mehmú añu tieni lugal el su enlaci matrimonial con la salvaóreña Consuelo Suncín.

Saint-Exupéry hizu una tupa viahih arreol to'l mundu (Alemania, Península Ibérica, Indochina, Norti d'África etc.) ehandu una güena riehtra reportahih.

En 1935 el su avión cai ahocicáu en metá 'el Desiertu 'el Sáhara, siendu ayuáuh él y el su compañeru Prévot pol una carabana de beduinuh, dihpuéh d'ehtal cincú díah ahilandu a puntinu d'ehpenal de sedi. To ehtu vieni a fegural en "Terre des Hommes" (Tierra de Hombris) (1939). Comu presona qu'era que nu vía enhamáh el perigru se l'apeteci queal uníuh pol vuelu New York y la Tierra 'el Fuego peru cai gravimenti heríu en Guatemala. Pa sanalsi pasa una rentoná en loh Estáu Uníuh ondi l'entalla el ehtrumpiciu de la IIª Guerra Mundial. De contáu horma parti 'el ehércitu aliáu, ondi puéi sentil endi mu cerquina lah hielih y aliñuh d'esa guerra: "Pilote de guerre" (Pilotu de guerra), "Lettre à un otage" (Carta a un prisioneru).

P'antoncih ehcomienza a dehcrebil el libru de loh libruh: "Le Petit Prince" (El Prencipinu), publicándulu en el añu 1943.

A pesal que se le queasi proibíu pilotál avionih pol falta hoventú, to hociúu consiguí una misión de reconocencia aérea. El 31 Huliu de 1944, sali de Córcega, la dama de la muerti le hinca la su guáña desapreveníamenti. Enhamáh apaeció ni el su avión ni el su cuerpu... ¡Qu'el su ehpritu vaiga en páj.

En dihpuéh d'ahuyil d'ehti mundu, d'unuh apuntih inconclusuh sali "citadelle" (Ciudaéla).